

Na osnovu čl. 25. i 69. Statuta Općine Centar Sarajevo-prečišćen tekst ("Službene novine Kantona Sarajevo" broj 23/04), planiranih sredstava u Budžetu Općine Centar Sarajevo za 2017. godinu za podršku poljoprivrednim proizvođačima, boračkoj i izbjegličkoj populaciji za nabavku plastenika, Općinski načelnik donosi

PRAVILNIK O UTVRĐIVANJU USLOVA, KRITERIJA I POSTUPKA ZA OSTVARIVANJE PRAVA NA DODJELU PLASTENIKA POVRŠINE 50m² SA DODATNOM OPREMOM NA PODRUČJU OPĆINE CENTAR SARAJEVO

OSNOVNE ODREDBE

Član 1.

Ovim Pravilnikom utvrđuju se uslovi, kriteriji i postupak za ostvarivanje prava građana sa područja općine Centar Sarajevo na dodjelu plastenika površine 50m² sa dodatnom opremom u sklopu projekta „Podrška poljoprivrednim proizvođačima, boračkoj i izbjegličkoj populaciji za nabavku plastenika“ (u daljem tekstu: Projekat).

Član 2.

Pravo na učešće u Projektu imaju svi zainteresovani građani navedeni u članu 1. Pravilnika koji imaju prebivalište na području općine Centar, posjeduju poljoprivredno zemljište na području općine Centar i ispunjavaju druge uslove propisane ovim Pravilnikom.

Pravo na dodjelu plastenika ne mogu ostvariti lica kao njihovi članovi porodičnog domaćinstva, koja su u ranijem periodu ostvarila pravo na donaciju, dodjelu ili sufinansiranje nabavke plastenika od općina, ministarstava, humanitarnih i drugih institucija.

USLOVI ZA OSTVARIVANJE PRAVA UČEŠĆA KANDIDATA U PROJEKTU

Član 3.

Pravo na dodjelu plastenika površine 50 m² sa dodatnom opremom mogu ostvariti kandidati pod slijedećim uslovima:

1. Da je podnosilac zahtjeva zakonski korisnik zemljišta pogodnog za plasteničku proizvodnju minimum 500 m² na području općine Centar (utvrđuje Komisija za dodjelu plastenika na licu mjesta),
2. Da navedeno zemljište pripada poljoprivrednom gazdinstvu, odnosno da je uz objekat stalnog mjesta boravka podnosioca zahtjeva (utvrđuje Komisija za dodjelu plastenika na licu mjesta).

Član 4.

Služba za privredu i lokalno ekonomski razvoj je nosilac aktivnosti vezanih za realizaciju Projekta. Sredstva za realizaciju projekta obezbjeđena su u Budžetu Općine Centar Sarajevo za 2017. godinu na ekonomskom kodu 615200.

IZBOR KANDIDATA

Član 5.

Javni poziv za predaju zahtjeva za dodjelu plastenika površine 50m² sa dodatnom opremom, objavljuje Općinski načelnik putem Službe za privredu i lokalno ekonomski razvoj, na web stranici Općine Centar i u jednom od dnevnih listova na području Federacije Bosne i Hercegovine koji je odabran u zakonom propisanoj proceduri za oglašavanje.

Javni poziv sadrži: uslove koje kandidat mora ispunjavati, kriterije za bodovanje, rok za podnošenje prijave i druge potrebne podatke.

Izbor kandidata za dodjelu plastenika vrši se na osnovu pristiglih prijava na Javni poziv.

Član 6.

Općinski načelnik imenuje stručnu Komisiju za dodjelu plastenika koja provodi postupak dodjele po objavljenom Javnom pozivu.

Zadatak Komisije je da: pregleda prispjele prijave po Javnom pozivu, utvrdi blagovremenost i potpunost istih, izvrši uviđaj na licu mjesta s ciljem utvrđivanja pogodnosti zemljišta za zasnivanje plasteničke proizvodnje, izvrši bodovanje i sačinjavanje prijedloga liste kandidata koji ispunjavaju uslove za dodjelu plastenika, na osnovu Pravilnika.

Odluku o dodjeli plastenika donosi Općinski načelnik na prijedlog Komisije za dodjelu plastenika. O rezultatima Javnog poziva, kandidati će biti obavješteni pismenim putem i putem web stranice Općine Centar Sarajevo.

Član 7.

Za obavljanje poslova iz stava (2) člana 6. ovog pravilnika članovi Komisije imaju pravo na naknadu. Isplata naknade izvršit će se na osnovu Zaključka Općinskog načelnika.

Sredstva za naknadu za rad komisija Općinskog načelnika, obezbijeđena su na kodu 613900.

Član 8.

Izabrani kandidati potpisuju Ugovor o dodjeli plastenika sa Općinskim načelnikom, kojim će biti regulisana sva dalja međusobna prava i obaveze.

KRITERIJI ZA DODJELU PLASTENIKA

Član 9.

Kriteriji za bodovanje podnesenih zahtjeva:

a) pogodnost zemljišta za zasnivanje plasteničke proizvodnje (utvrđuje Komisija za dodjelu plastenika uviđajem na licu mjesta)

-da je površina zemljišta gdje će se postaviti platenik ravna ili veoma blagog nagiba,

-da zemljište nije vlažno odnosno sklono zabarivanju,

-da nije u blizini objekata koji bi mogli stvarati sjenu na plateniku,

-da je zemljište udaljeno od industrijskih zagađivača minimum 1 km, a od glavnih saobraćajnica 70 m,

-da je u neposrednoj blizini izvorišta vode ili vodovodne mreže.

Ukupno.....30 bodova

b) posjedovanje sertifikata o završenom kursu-edukaciji o plasteničkoj proizvodnji ..10 bodova

c) dodatni bodovi po osnovu pripadnosti podnosioca zahtjeva jednoj od dole navedenih kategorija:

- podnosilac zahtjeva nezaposlen25 bodova
 - *za sve nezaposlene članove uže porodice podnosioca zahtjeva,ukupno.....10 bodova
- demobilisani borac.....10 bodova
- uži član porodice šehida, poginulih, umrlih ili nestalih branitelja10 bodova
- RVI10 bodova
- civilna žrtva rata.....5 bodova
- logoraš5 bodova

d) licima iz prethodnog stava smatraju se lica utvrđena Zakonom o dopunskim pravima boraca-branitelja Bosne i Hercegovine – Prečišćeni tekst („Službene novine Kantona Sarajevo“ br. 45/12 i 26/14).

Član 10.


Kandidati koji prilikom bodovanja ostvare isti broj bodova, prednost će imati onaj kandidat sa članovima uže porodice koji nisu zaposleni.

Član 11.

Pravilnik stupa na snagu danom donošenja, a naknadno će biti istaknut na Oglasnoj ploči i web stranici Općine Centar.

Broj: 10-49-648 /17

Datum; 15.03.17



OPĆINSKI NAČELNIK
Prof.dr.Nedžad Ajnadžić

